

本朝分省人物考

人物考卷之三十四目錄

南直隸廬州府 二

郭彥仁

瞿能

陳植

廖鏞

孫鎮

蔚綬

邢寬

張敵

湯鼎

薛遠

王清

余斌

陳儀

李春

汪霖

鄭時

秦民悅

潘稹

朱賢

吳廷翰

王恒

吳凱

張淳

周璽

潘鏜

魏澆

彭辯之

潘銳

沈俊

吳蘭

黃道月

潘子嘉

鄭杲

張梅

補遺

潘岳

劉會

馮禎

姚壽

丁鏞

寶子備

本朝京省人物考卷之三十四

南直隸廬州府

郭彥仁

郭彥仁無爲人少讀書有勇畧尤長於吏事歸附

太祖以忠謹被知遇事多委任李文忠用兵浙西命

彥仁往爲叅謀多所裨益歲戊戌三月文忠以克嚴

州功陞帳前左副都指揮守嚴州命彥仁充本司督

事時胡大海亦以平嚴州陞院判文忠與之有隙四

月上批示彥仁云保指揮我之親男胡大海我之

心腹前者曾聞二人不和且保指揮我之身也胡院

判卽我心也身包其心心得其安心若定身自然而定汝必丁寧說知彥仁懇道上意將領和愜所向成功文忠待彥仁禮甚隆凡攻守機略悉預畫提師擊寇有功賜銀幣壬戌二月金華苗將蔣英等作亂殺守臣叅政胡大海文忠卽遣彥仁率兵討之彥仁兼程而進至蘭谿英等懼夜半遁去彥仁遂入金華撫其民時處州苗將李佑之等亦殺守將耿再成文忠復調彥仁領兵屯縉雲以遏其侵軼後援新城取杭州平浙西皆預有勞績授嚴州府知府

瞿能

瞿能字世賢合肥人開國功臣都督通之子也驍勇
絕倫力學爲文以禮下士少隨父累立戰功洪武中
以四川都指揮使夜渡大河擊西番克捷頃之判酉
月魯帖木兒據建昌能討平之移鎮雲南是時麓川
刀幹孟構兵逐其主思倫發能率兵大破其衆復征
寧遠金齒皆平之靖難兵起建文召爲右都督同大
將李景隆北拒奮勇力戰景隆忌能成功率率牽止之
次於白溝河南北合戰諸將皆巽懦不前能父子先
登所向披靡明日再戰矢盡劍缺人馬俱疲能復引
衆躍前大呼斬首百餘前越雋侯俞通淵復募兵赴

之時旋風大起北兵乘風突擊乃以輕騎繞出其後
合兵大戰移時南軍遂北能父子猶揮劍斬十餘騎
死之

陳 植

陳植廬江人元舉河南鄉試不仕洪武間起爲吏部
文選主事歷官兵部侍郎靖難兵至植受命督師江
上有督將密議降者植責以大義督將銜之遂遇害
督將率衆奉迎自陳邀賞 文皇立誅其人具棺殮
植遣官護喪塋於白石山

廖 鏞

廖鏞巢縣人祖永忠開國功封德慶侯父權嗣封鏞
以適子任散騎舍人歷官至都督建文中與議兵事
時宿殿廷靖難後文皇以廖權兩子鏞與銘嘗受
學方孝孺令召之孝孺怒曰汝讀幾年書還不識箇
是字兩子復命文皇大怒令收孝孺刑之聚寶門
外凡七日罵聲不絕廖兩子拾遺骸塋聚寶門外山
上甫畢而廖氏亦見收鏞銘送刑部論死鏞弟鉞及
從父淮安指揮僉事昇俱謫戍邊鏞母東甌主長女
也并銘女送浣衣局

孫鎮

孫鎮字希武合肥人爲諸生以經明行修中制科卒業太學除戶部度支主事通敏練達高祖嘉之賜鈔若干緡以旌其能頃之上以課程事連坐部官鎮上疏諫不宜連坐以傷國體語多峭直遂謫戍滇南已卯春廷臣郭資等論薦召復其官應制賦禁柳詩稱旨拜衛輝知府毀淫祠撤浮屠興學課士教民樹畜驅蝗禱雨神率效靈壬午靖難兵南下守備內臣倡謀迎附鎮堅守不下迨文廟登極以抗節不附者置之法乃謫戍山海歷二十餘年宣德初御史王紹首薦赦回至京師除上饒丞不就卒於京邸別

號冲玄子所著有冲玄稿若干卷

蔚 綬

蔚綬字大章合肥縣人秉心淳實履行端方洪武中
由監生授戶部度支主事歷員外郎精核出納下人
不得緣以爲奸革除中陞山西右叅議再著賢聲永
樂六年陞戶部右侍郎本年改禮部右侍郎時尚書
呂震恃才自用又深刻難測小心謹畏震亦雅重之
屢知貢舉及廷試提調官關防嚴密類多得人十
九年定鼎北京震改北部綬掌部事二十二年綬奏
四川雲南官民生駱進等六十一人例當給賜夏衣

其琉球官生周魯美等尚猶未行宜一體給賜自後
邇年冬夏衣皆本部行文南京工部成造依時給賜
不待奏請著爲令馳奏以聞 上從之至洪熙元年
陞禮部尚書宣德四年致仕後卒於官賜祭葬

邢寬

邢寬字用大無爲州人自少穎敏力學不輟永樂甲
辰廷試初以孫曰恭爲第一 太宗皇帝以曰恭一
暴字耳及見邢寬二字甚喜遂擢爲第一授翰林院
修撰與修 仁宗實錄成陞侍講正統戊午復修
宣宗實錄賜金織文綺陞從五品俸已未同考會試

尋引疾家居上言民情十餘事丙寅召至京命復任
事丁卯主考順天鄉試景泰壬申陞南京翰林院侍
講學士署南京國子監事景泰五年六月卒遣官諭
祭寬居家孝友與人交終始不渝且處已坦夷於物
無所忤以足疾不良於行故不得久於內朝云

張敬

張敬合肥人字伯起修髯魁幹卓有時名永樂中貢
入太學除廣東道監察御史扈從車駕北征軍令
嚴肅凱旋有金牌鑑幣之賜欽差開辦延平銀場
局課歲輸一毫不染歷五年閩人頌其清銓部考最

擢陝西按察司僉事政尚平恕務存大體後被謗
左遷廣平令怡然之任興學勸農惠政遠敷歷九載
上疏乞休 上命復僉事致仕子鑑國子生篤行懋
學克振家聲未仕卒

湯 鼎

湯鼎無爲州人宣德二年進士授吏科給事中時交
趾復叛 上命鼎往撫之鼎至敷宣聖德指陳利害
夷人懽服奉貢表謝私餽一無所受中外重之

薛 遠

薛遠字維遠無爲州人登宣德壬戌進士授戶部主

事勤慎精敏不避艱險遷員外郎中承部檄覈實南
直逋稅文案山積洞燭肯綮得羨餘萬石歸之於公
又同御史倪敬按大同邊儲搜抉隱匿邊餉以足天
順元年命使交趾還晉戶部右侍郎尋丁母艱四年
河決河內詔起復以工部侍郎總督河道至則集工
壯三萬餘人分工授任決口遂塞又自揚州海門鑿
河四十里以洩積潦蠲災賑饑伐材爲屋以居流徙
還復授戶部會兵討蠻獠督餉征調諭其衆能破賊
者卽有輜貨人人奮勇師至大藤峽躬冒矢石腹背
夾攻賊平陞左侍郎有白金文綺之賜尋進尚書總

督京儲時與巨璫汪直相忤嗾言官論之遠力請致仕予告復以近侍吳綬力薦詔起南京兵部尚書叅贊機務以疾辭不允而汪直必欲力驅之復嗾言官論劾復懇乞致仕得歸廕一子中書舍人弘治乙卯卒年八十有二遠性敏而好學凡禮樂兵刑天文律曆無不涉其要尤熟國家典故仕宦四十年家無長物食無兼味室無媵妾曰吾少時恒不足今安忍有餘哉人以是稱其守

王清

王清字一寧合肥人世以武功爲濟寧衛指揮慷慨

多勇略常領兵入衛宣德間率所部出喜峰口及至
鴛鴦海覘虜累立奇功正統二年陞廣東都指揮以
親老不遂迎養陳情乞分俸於原衛詔許之蠻夷叛
據大藤峽清往討有功戊辰總督廣東軍務已巳協
同總兵駐軍高州廣賊黃蕭養劫鄉民叛衆十餘萬
圍攻廣州清帥舟師赴援至沙角尾水淺舟膠失利
被執賊素知清威望不敢害清投水不死因寄衣還
廣城中大書一詩兩捧 天書鎮百蠻偶因兵敗不
生還飄零身世輕於葉磊落襟懷重似山半夜愁吟
珠海寺幾回夢墮鬼門關憑君獨有衣相寄爲我招

魂宇宙間數日賊擁清至城下使諭衆開門降清罵
不絕口遂遇害朝廷憫之加子爵二級清善律詩所
著有建橐集行於世

余斌

余斌合肥縣人前浙江都指揮同知成之子年弱冠
襲職爲處州衛指揮使戎務之暇留心經史延禮文
士商確政事宣德五年調除定海衛自建義學延師
儒令官家軍民子弟願學者咸肄業焉公暇躬詣考
閱而激勵之務期有成以庶自持自撰公勤廉謹四
銘書於廳事以自勵城南海山有大浹渡常覆舟溺

人自撰文祭其神後遂無患六年仍調處州衛捕盜
有功七年陞浙江都指揮僉事九年冬以疾卒年才
三十有二衆咸惜之

陳儀

陳儀字叔度合肥人自少端重謙和無綺紈之習好
文章喜韜略務窮其所至欲以自立於世當時論勲
臣子弟有文武才具者必稱焉永樂中宣宗皇帝
爲皇大孫詔選良家子入侍儀與焉上雅知其才
特見親任有所顧問必盡誠以對漢王薈異謀數言
其姦狀事定以俘獲賜羣臣儀得與侯伯等益異恩

也車駕巡邊出喜峰口以驍勇選當前鋒適虜寇犯邊多所殺獲其後屢出巡邊儀皆扈從有勞績正統成國公朱勇等交薦詔大臣試所業其言出奇制勝之道皆合古兵法而復精於騎射引弓連發中的諸軍皆大呼稱快同試者皆自以爲不及遂擢爲勲衛日帶刀侍從益以忠謹見稱瓦剌使朝貢上命豐城侯李賢率兵送之出境言於上曰今兵出遠慮或有緩急願得勲衛陳儀者偕往可計事出塞二千餘里而還虜寇孕兒只伯擾西鄙上言請於寧夏甘肅簡精銳俟春暖俱發諸道並進且先約瓦剌相

爲犄角殘虜破敗之餘必就擒戮此萬全計也 上
然之正統五年麓川叛 上命儀從定西伯蔣貴兵
部尚書王驥往討之明年抵其境蒲羅諸蠻作亂道
梗不通儀率衆直搗巢穴擒其首惡殺數十百人諸
蠻遁走師遂進招降斬殺儀功居最陞錦衣衛指揮
同知其冬攻克孟雷諸寨斬二千餘級又領軍獨進
抵南甸所向摧靡駐營馬鞍山下爲大軍後援遂以
成功師還永昌蔣公王公命爲文勒諸石以彰聖德
還朝論功陞指揮使賞賚甚厚明年陞都指揮僉事
留守雲南積糧治兵爲後圖而乃以疾終享年五十

有二襯還葬應天大山之原

李春

李春無爲州人正統七年進士任兵科給事中直聲表著權貴忌之陞福建叅議時汀州有劇盜肆掠鄉邑無可誰何春親抵賊巢諭之衆皆投戈泣降陞江西左叅政尋陞按察使所歷三藩咸著能績

汪霖

汪霖字潤夫六安州人登景泰甲戌進士拜監察御史出按雲南操已愼布憲公讞獄多所平反吏民頌之丁父憂復職按浙江操持益勵時錦衣衛指揮門

達方秉權談其子商於浙自鎮守官以下皆曲意悅之以霖獨不禮也歸譖之達怒遣校尉偵之卒以無罪免還掌江西道適 憲宗嗣大統言官劾門達抵罪霖力薦前都御史王公竝李公秉皆復任天下謹快先是兩廣蠻寇出沒且十載屢征不克至是命都督趙輔率師征之而以霖監軍事申嚴軍令肅然憚之自京抵兩廣所過安堵旣而審功論級功罪咸當凱奏拜大理寺丞秩滿陟本寺右少卿成化十三年擢都御史被飭邊撫巡之命遂乘驛徧所治戒將佐練士卒葺城堡樓櫓簡器械軍聲用張虜莫敢犯且

勵守宰俾勤恤民隱無或怠違舊例邊軍糧餉永平府給古北口薊州給山海關皆以車運費重而途艱竊請以銀代糧分給之兵民兩便皆歡欣感戴至成化十六年卒於京壽六十三

鄭時

鄭時字宗良舒城縣人景泰辛未進士授監察御史以能稱出按湖廣江西所至風裁凜然彈劾不避權倖天順五年爲用事者所忌左遷河南內鄉縣知縣拓城郭增水利興起教化有異政成化元年擢知福建延平府政尚嚴明禱雨輒應民爲立應雨亭紀之

去任更名曰去思三年丁亥父母繼歿廬墓三年有
白兔馴擾之異有司上其事追而止之會歲饑發廩
爲粥里人貸券悉焚之六年服闋改知福州十三年
遷四川左叅政十五年進按察使十七年轉湖廣左
布政使聲聞益著十九年擢都察院右副都御史巡
撫陝西大饑人相食百方賑恤言於上得內帑金
四十萬以濟旣至乃命布政等官分守城門給散無
敢漁者朔望必至文廟行香講書人問其故時曰方
今人情涵涵吾旣賑之復儆省以大義亂何由起又
符移六道周恤民隱疏平涼利民渠民多感之江南

湖廣等處盜起遣人諭之多解散擒其渠魁戮之更
奏於寧羗分水嶺設縣巡司以便統屬成化二十二
年因左道惑衆嬖倖因之以階進取上言利國保民
五事一盡誠敬以回天意二明理義以杜妖妄三減
進貢以蘇民困四息傳奉以抑僥倖五重名器以待
有功辭多切直觸時諱尋有貴州左叅政之訖行然
就道陝西之民如失父母所至遮道不得行至有繪
像以祀者弘治改元陞左副都御史撫治鄖陽本年
改撫湖廣三年轉南京兵部右侍郎四年進南京刑
部尚書留心政務益大厥施讞獄必求其情矜疑者

輒辯之一時無稱寃者八年屢疏請老 詔允之命
給尚書誥命以歸爲人嚴重狷介百無所好惟好施
予處人以恩信不忍言人過敷歷中外四十餘年庶
慎之行始終如一優游桑梓清節不改以壽考令終
鄉人無分遠近咸哭吊之

秦民悅

秦民悅字崇化舒城人天順丁丑進士授行人遷工
部屯田員外郎賑濟京畿諸縣多所全活成化壬辰
遷廣平知府剛毅開敏能卓然自立政出公平百廢
修舉檢勘荒田馬地共三十餘頃辯寃理滯招撫流

卓然在人耳目考政爲郡守第一九載去任民立
祠樹碑以思之甲辰遷江西叅政弘治改元擢右布
政數月轉左凡三任皆在江西熟諳民情 黠奸吏
抑豪強均賦平役民賴以安辛亥擢右副都御史整
飭薊州等處邊備兼巡撫順天等府奏乞減莊田租
課以舒民困增密雲古北口官軍招募士兵以防衝
突皆蒙嘉納其年遷戶部右侍郎甲寅改吏部右侍
郎明年以父喪去服闋添註都察院右副都御史未
幾改吏部右侍郎己未拜南吏部尚書庚申改南兵
部癸亥丁繼母憂乙丑服闋復南戶部正德丁卯致

仕以辛亥年卒年七十九計聞賜祭葬如例謚莊簡
民悅沉靜謹恪進止有常平居手不釋卷操觚染翰
至老而猶不倦云

潘 稹

潘稹六安州人字景徵監察御史岳之子也登天順
甲辰進士授監察御史直節直聲爲流輩所推按廣
東振揚風紀兩劾統兵者之不律都御史韓雍銜之
欲摭事中傷竟不克擢福建副使明慎果斷獄無冤
滯福寧產銀礦先是輸課者加耗息至則陰發其奸
而以補他課之逋擢四川按察使視篆不越月出滯

獄千人雪死刑至有生祠於家者豪僧恃王國勢要武斷鄉曲卒擒寘於法民歌頌之陞四川左布政使值貴州苗寇猖獗徵兵餉於蜀開府重臣罔知所措稹請以夷攻夷而以近疆播州龍州之卒應之咸服其有文武才會試正榜額以南北中三數取人而中數額最少嘗建議請調停之中貴人舞權藉上供之名責公帑銀二千以市土物稹堅持不與鄉貴請託一切謝之由是得謗致政卒終於家所著有正鳴集

朱賢

朱賢六安州人字從善登天順庚辰進士性剛介美

手儀潛心理學與天台陳選齊名拜監察御史每抗
疏切諫 朝廷呼爲梓潼御史後以言事忤 旨謫
花林驛丞尋復職按福建風紀肅然監文衡所著論
式人謂歐陽起鳴法度一時縉紳稱爲三絕云

吳廷翰

吳廷翰字崧伯無爲州人生而穎異業禮舉應天第
五人明年登進士授兵戶二部主事推督德州等處
糧儲改吏部文選僉廣東尋改浙江轉山西叅議致
仕所至不激不隨撫循建白皆井井可法晚年手不
釋卷益旁通經史百家所著有漫錄叢言續記甕記

志略考及湖山小稿蘇原全集若干卷子國寶第進士詩文有聲云

王恒

王恒廬江人字克昌敬之子幼穎敏以童子從父南雍能習詹孟舉大書年十二隨父謁選惟讀書以圖報補父以上聞英廟召見御前作天下太平四字上覽之喜賜寶鈔半酒送翰林院讀書學士丘仲深見其所屬詩文深器重之天順四年擢中書舍人尋進太常寺丞性不苟合左遷工部主事分司蕪湖旣蒞事征權以法羨餘數千緡悉輸之公及領尚

書度支司漕淮上利興幣革多所建明弘治間進階
中憲大夫卒

吳 凱

吳凱合肥人字廷輔天順壬午領鄉薦成化壬辰進
士乞歸省親會母疾抵城卽步入趣候衣冠拜牀下
晝夜躬湯藥母死旣葬每旦至墓所號泣進香饌運
土封植不資傭役服闋拜兵科給事中一時如濡須
仰昇同邑方陟皆入諫垣語曰淮西三鳳凱在兵科
詳封駁善敷奏動存大體適邊陲告匱承 旨往勘
剪抑豪右明典守之罪邊儲賴以充實同寅知凱果

敏推凱清理京衛軍凱効武弁不職四百餘員軍政肅清憲廟嘉獎賜酒饌賞資甚厚歸展松楸終養厥考有廣東少叅之命卒於道

張淳

張淳字宗厚合肥人僉事敵之孫也成化丙午薦於鄉明年登進士初令瀏陽有逋賦歲積萬計乃糧長侵費淳至喻以忠言皆感泣來輸三年政成召爲監察御史會岷府奏逮知州劉遜臺省疏掾俱下獄淳方自外還抗疏請惜耳目以庇元首孝宗意解尋釋之出按貴州有負固者乃招撫之擒渠魁曾安阿

保父子餘黨五十九寨悉爲徧氓轉吉安知府吉民
健訟蔓引動數百人經歲不決淳惟取當逮者訊之
剖析如流輒手書片紙示吏吏無所措其奸版籍多
巧僞淳廉得其實役均弊絕久之豪猾屏迹公庭晝
靜若無事者自奉甚薄朝夕惟一鮑魚秩滿歸橐如
罄又復課農桑興學育才修里社敦尚節義民爲剗
賢侯祠尋陞四川按察司副使整飭松藩兵備適諸
番叛乃召集諸將授以方略皆相繼授首諸番懾服
進太僕少卿綜理馬政務在便民轉應天尹多惠政
士民賦京兆十思擢右副都御史撫治鄖陽時四川

劇賊新敗疏請駐兵房竹等處以防奔突賊平有金
幣之賜改巡撫保定兼提督紫荊等關是時傳報邊
警淳經略邊務悉心區畫虜遁去河間諸郡告饑奉
勅賑濟全活者以萬計進階通議大夫上疏乞歸
上以溫旨慰留疏三上始得奉 旨馳驛回籍淳
居身清約惟敝屋數椽山二頃園一區客至談說經
史或世故移日不倦有請託者禮遣之故人不取干
以私卒年六十有六塋祭 恤典恩禮有加焉生二
子長卽相次子標

周 璽

周璽字天章合肥人弘治丙辰進士任吏科給事中
始事 孝宗多所建白上一一採納迨 武宗卽位
逆瑾專權疏其擅改成命竟違詔旨罔上行私氣焰
逼人朝士斂手以避乞明正典刑以謝天下疏上瑾
銜恨乃囑陞順天府丞使去言路思設計以殺之嗾
錦衣指揮楊玉誣以蔑視使臣遂矯制收付於獄令
玉自鞠玉杖之三十略不少屈曰吾死不足惜令忠
義畏慄可惜耳瑾聞而益憾之又令加挾遂死於獄
卒年四十七後瑾伏誅正德朝賜祭至世宗卽位復
賜諭祭有抑鬱未伸遽焉淪沒之句廕其子仍廕其

孫勅建嵒祠於合肥城東春秋令有司特祭焉

潘鏜

潘鏜字宗節六安州人能言卽解記誦七歲賦詩輒出奇語驚人十歲能讀史略論古成敗十六侍布政公入京值疾不脫衣者踰日周防僕御內外無失才行已見成化丙午舉應天鄉試逮弘治丙辰登進士第授滿城令愷悌子育不設厲禁凡徵輸善量緩急常獲寬省邑有巨猾好敗官政或諷鏜殺之笑曰獨非民邪吾知自檢而已丁布政公憂去任治裝不滿一車父老與諸生遮道泣送日乃今見古廉吏相

數百里乃捨去樹碑頌其遺愛居喪哀毀骨立殮塋
有禮服闋除滑縣知縣滑爲畿輔大邑賦重民玩前
令率坐廢下車首聽滯獄風行雷斷五日而囹圄爲
空乃理逋賦壅蔽者曰民猶水也塞則潰疏則流於
是解勞剔蠹犁然有條人人以爲惠爭先輸納閱三
月而租入大集郡守韓公嘆曰民豈不可化哉何滑
民昔狡而今良也縣籍口賦里胥故多爲奸乃誓諸
社曰所不惠於民者神有顯殛籍成踰月忽有抱策
愬庭下者曰某等負公作奸者盡疫死某幸生願正
此籍因許釐正爲式人謂其誠信通於人神初至滑

前令擅移官帑銀數千兩籍亂不可稽曰殆哉殞身
非予其誰掩此乃檢括規畫俾充其數竟不令前令
知也被徵去府人出羨金二百爲贐曰欺人不誠黷
貨不貞吾豈以毫末而敗吾素令籍之庫父老請立
石以識曰無庸第無忘今日可也甲子拜監察御史
首論時務大計四曰敦大體權時宜重將權倡士氣
太監高鳳蔭從子曰此王振曹欽之漸不可長也請
加黜罰奉命勞軍遼東燕公有威邊將歛手歸上備
邊五策曰酌戍守之宜憫戍卒之苦儲將來之用豫
未然之戒革科歛之弊皆中肯綮

南便養

得改南京湖廣道無何鳳與瑾相比矯 旨削籍明年詔罷黨惡若干人鏗與焉蓋正德丁卯也家居以御史罪前後輸米三百石鬻產供命庚午詔復冠帶文安賊寇六安郡人視以爲去留乃謂子弟曰我世臣也當爲國捍患若等宜避地以存宗祀遂與守臣設策拒守城被圍者三日竟得不陷癸酉起授廣東按察司僉事持法平恕人以無冤有縣丞楊某者以貪見黜辭去泣下不已太守李君嘆曰焉有奪人官乃感泣者哉吾不知潘公何以致此有知縣黃某者懷百金見謁曰與尹處及期而不見信吾不德也若

暴尹罪以章已庶吾亦不爲黃慙謝去廣山徭剽掠
爲近鄙患奮計率其夜擣其穴諸公首鼠兩端曰我
任之母憂公等也功成不失一矢衆咸嘆服有常氏
兄弟爭財久不決開諭義利自相引伏乙亥年踰五
十嘆曰顛毛種種矣猶俯仰逐人後志其終不可行
邪遂上疏請老銓司下檄慰止御史丁君濬曰請小
屈以易腰帶笑曰歸敝廬後當卉服與野人俱帶且
棄去何有於金復上疏不待報而行蓋入廣往返僅
一年耳歸五年疾作遂不起鏜孝友之誠出自天性
事繼母曲盡顏色寒燠饑飽躬自慰問珍果名醞獻

而後嘗謹於祭先非疾病不敢不親尤重立春之祭
曰謂有僭於禮乎非此則祧與殤不血食矣祭畢會
宴昆弟子姓務盡歡愛凡臨父母忌日則素服屏居
不御酒肉善事孀姊俾安其節處諸昆弟及兄弟之
子內不吝情外不吝力親疎有差無不各當其分性
寬大明坦能恕人所不及忘人所不道與人交不設
城府久益誠信其爲學有源委不事枝葉嘗曰古人
之學惟求此心今人外心以爲學故汗漫無歸凡與
學士談聖賢之道如啖飴蜜甘而有餘味也文尚氣
骨下筆輒千百言奇正變化具有繩度作詩冲淡爾

雅酷愛陳拾遺及韋柳古詩故擬古之作恒多初號
石湖後田於團山之間更號團山野人所著有團山
集十卷藏於家春秋五十有六

魏 澆

魏澆合肥人正德戊辰進士六年任鴻臚寺左少卿
九年考滿陞本寺卿初通事缺人見在通事假訪保
名橫行求索視利輕重爲出入嘉靖元年澆疏其
凡選補各國通事除丁憂緣事俱不作缺其見缺
人以上及一國全缺者在外行各邊鎮巡每缺精選
一人送部在京不必通行通事訪保禮部劄鴻臚寺

召選真正籍貫子弟取具印信保結粘送部覆審相
同丹試每缺精選一人奏送該寺分派各國年深老
成通事教習如本國無人許其自從師受業或鄰邦
通曉者教之一年之後同邊方訪保到部之人通行
試以夷語上者收補次者候下者黜退不得稱守候
多年以濫收選時勘結人員不得以過犯頂冒之人
竄入著爲令禮部覆議 詔從之歷太常寺卿掌鴻
臚寺事

彭辯之

彭辯之霍山人字問夫登正德戊辰進士知餘杭縣

時逆瑾舞權濶省苦於織造力裁之邑得不擾擢工部主事尋調兵部武庫司建修舉邦政四事頒行天下出補饒州守政靜民安崇素若肅布然與營道不合歸部使者稱其操貞冰蘖復起彰德守清聲茂著遠邇懷服進山東叅政投牘勇退

潘銳

潘銳六安人字宗魯鏜之從弟登正德丁丑進士初授行人伏闕諫止巡幸跪曝十日廷杖謫南京國子監學錄世廟改元詔復行人上言當事大臣尋又杖謫其剛直蓋天性云

沈俊

沈俊廬州人正德丁丑進士知萊陽縣時寇盜甫戢縣治殘毀民流竄者過半俊露處視事以撫流亡不期年安堵如故民忘其亂擢御史按山西湖廣去奸黜慝時咸服其威明

吳蘭

吳蘭字欽佩霍山人嘉靖壬戌進士初授濰縣知縣蘭風韻古雅脫屣塵凡不喜對簿書爲俗吏謝令改衢州教授談道爲樂有春風沂水之況擢國子監丞進禮部主事以盛名取直內閣兼翰林典籍內艱歸

篤孝秉禮服闋游泳潛臺勝境陟南嶽孤峰俯視煙
海不復有宦況矣或勸之出遂焚棄官符性真率鄉
人愛之卽蓬華下室亦可招延居第蕭然爲文冲淡
流鬯有陶謝風援筆立成灑翰尤遒勁有法卒於家

黃道月

黃道月字德卿合肥人也美姿態工文詞喜讀相如
書與百家之言五七言長句絕似李青蓮少好擊劍
江淮之俠無不從游且不惜百金購名馬挽强弓蓋
其志摘豔秣林揚戈溫隅絳旗雷鼓與昭銘鴻勒共
耀當年矣萬曆丙戌計偕飲陳通叅所汝南劉玄子

後至見座上有美丈夫卽欲把臂爲懽問姓字各驚訝客散陳獨留此兩人接袪連觴漸近談咲陳公喜曰二賢已列榜中各大咲醉去旦視榜僅隔一名繇是與同榜潘元徵平湖王銘新秀水黃履常無錫安小范共玄子爲生死交元徵置酒招諸子小范夜方至曰余非由五侯七貴家來與安三來自滿井耳井水溘溢余樂之飲大醉卽提巾脫頭髮委地鏡人坐誦所賦滿井詩若白雪清風與俱飄飄謫仙人也嘗與子春玄子小范遊西山岼幘衣半臂紫袷坐連錢驄馬挾彈飛鳥應手而落遊人從之如雲卽以烏犢

游人爲之語曰得山禽從舍人嘗見楊司徒曰黃舍人偉幹雋流終當建勲萬里外不爾風節矯矯表論朝宁匡衡劉向之儔非腹背毳故公卿見者莫不以是望之嘗謂玄子曰衷尠逢干之心略非仲毅之智理無蒙莊之達寧人乎今世文學北地信陽它無聞也吾黨豈弗肆咤天下今邊如奕非亡奕秋亡枰子耳枰者馬也子者兵也亡之卽奕秋且袖手有之則戰者必也寧與角和平一日曾司空楊司成談性命學楊司成問曰何謂朝聞道夕死可也道無生死生而非生死而非死虞澹驚顧玄子曰孰謂仲子雄於

詞豪於技哉頃聞父訃仲子嘔血立毀別玄子燕市
留詞曰燕雲斷兮雲飛黃鵠決兮羽稀江有蘭兮愁
余虬螭鰲兮踟躕生有交兮死不離嗚呼此非屈靈
均招魂息夫躬絕命詞與旣葬其父號於墓而仲子
死仲子之哀又何烈乎孝弟自其天性然矣所著書
若干篇行於世

潘子嘉

潘子嘉字汝亨六安州人御史鏜之子也幼承家學
穎異老成聞甘泉湛先生開館於南雍負笈往從問
學甘泉子曰在聞道問道日子能知本體不假人力

故知勿忘勿助之間無所用力者斯得之矣問忘助
曰忘助皆私心也滯於物勝於事皆忘也矜持欲速
皆助也問勿忘勿助之間曰無在無不在也中正而
不息易所謂神而明之存乎其人聞之頓然有悟乃
與蔣道林沈艾陵諸公日夕研究歸聞當道有惡人
講學者遂謝去餽廩讀書山中越六年聞人督學廉
其恬退命有司以禮致之強之復學以歲薦貢之南
宮未幾歸以疾卒子嘉居家孝友事繼母不違顏色
待異母弟推讓財產壯年失偶不再娶訃聞京師蔣
道林諸公胥緘辭哭奠有惺菴文集藏於家

鄭杲

鄭杲字義民合肥人少穎敏有大志補邑庠弟子員
經史子集靡不通曉一日有省厭舉業作詩云人生
如朝露光景不可留胡爲名利間趨逐恣所求本分
有真樂乃復事遠謀涉海浩無涯甘作濡首遊及時
不鞭策歲月爲我讐嘗出遊訪豐城楊先生庶聞鑒
閭賀公欽有古人風將往卒業焉頃之丁外艱廬於
墓所哀毀骨立染孱疾不起作絕命詞云不孝罪通
天一病幾五月調攝弗自遑遂爾成永訣三年未終
竟四物尚茲缺老母孤且衰誰爲侍巾櫛萬事吾已

休含恨向夜穴遂卒卒之日年二十九新淦于鳳題
其墓碣曰篤孝鄭生

張梅

張梅合肥縣民梅家甚貧事母常能盡子道萬曆六
年母病肺甚篤乃嘗其穢并其痰焚香告天願以身
代母果病愈十一年母復病癰親爲吮舐其母病復
愈又塋祖綬適隆冬大雪泣告天地僵臥穴中忽然
晴霽又父文貴病歿築廬墓側日夕悲號三冬之時
山花徧發人以爲孝感之祥名著一方年逾六十

補遺

潘岳

潘岳六安州人永樂丁酉舉人授鄭州訓導經明行脩善于造士出其門者科第不乏任滿績著選拜雲南道御史以言事忤 旨充祿帥府帥待以優假曰非 朝廷意也佩吏服操事不懈六閱月復原職兩按浙江福建單騎問民疾苦所至肅清盜屏民安辭疾家居置祭田義田敦行睦族間黨莫不仰慕之

劉會

劉會英山縣人正統乙丑進士授戶部主事十四年扈 駕北征土木之變捐軀死難奉 勅褒贈錄其

子劉端儀入胄監後以孤貧未能赴選而卒

馮禎

馮禎舒城縣人由綏德衛旗軍累功至都指揮僉事
克叅將分守寧夏西路寘鐫之變禎及協守孫隆等
馳奏告變事平陞署都指揮同知正德七年巨賊劉
六等流劫伊洛間禎奉命徵至河間忽與賊遇督所
部鏖戰下令毋顧首級毋貪所遺輜重追奔數十里
斬獲數百人論功陞都督僉事比至河南而賊復有
西平之敗由上蔡商水遁去巡撫鄧璋等狃于一勝
過汝寧朝王宴飲連日賊得招集散亡勢復猖獗攻

鄆陵西華長葛新鄭等縣所過殘害遂至河南府圍城三日諸軍始追及之無復部伍賊乘我軍饑疲率衆迎戰禎及副總兵時源叅將神周方列陣而叅將姚信所部京軍馳突禎前與賊交鋒竟失利先遁我軍陣亂賊麾衆驟至禎下馬步戰手刃數十賊死焉事聞璋等奪俸戴罪征討而贈禎洛南伯賜祭葬子大金襲陞都督僉事後每歲當禎死日其地遂風霾大作洛人乃往伊府奏聞勅立祠洛濱於死之日祭之

姚壽

姚壽字維祺舒城縣人成化二十年進士由行人選御史屢疏忤瑾降貴陽驛丞卒

丁鏞

丁鏞字元聲無爲州人由歲貢歷官廣西左叅議致仕清介端方鄉居二十餘年不入城廂不以毫末干有司惟着白布袍以耕讀自娛郡守朱公高其誼繪淵明圖贈之

竇子偁

竇子偁號淮南合肥人中萬曆乙酉鄉試壬辰成進士授大理寺評事甲午貴州主考乙未陞寺副本年

陞刑部員外丙申調戶部郎中管宣府糧儲戊戌陞
泉州知府辛丑陞湖廣提學副使甲辰陞福建叅政
己酉補江西叅政辛亥陞浙江按察使陞右布政壬
子致仕起福建右布政癸丑陞本省左布政乙卯致
仕子僉歷任中外俱以清節顯而楚中督學之政秉
公執法甄收多知名士至今籍籍輿誦云

人物考卷之三十五目錄

南直隸安慶府

劉燾

吳昇

韓隆

謝祐

姚旭

董寔

柳溥

葉華

方佑

程亭

江弘濟

方向

王端

余順

李璡

錢如京

李淳

余珊

方鵬

張澤

趙鈇

阮鶚

彭寶

夏恩

補遺

徐之鸞

金燕

目錄終

本朝京省人物考卷之三十五

南直隸安慶府一

劉燾

劉燾字尚載太湖人洪武末年以太學生授廣西柳州知府燾寬厚不苛留心民瘼諸所興革咸當人心邑有以屠牛爲業者牛銜刀奔入府跪于階下悲鳴如有所訴召其人至諭以善語復厲私殺之禁久之一邑皆化無復有食牛肉者在郡數年不事鞭扑不善者但從容教誘之人亦相感而爲善良陞河南副使肅王聞其賢特加禮敬書霜月軒贈之所在皆

東坡全集卷三十五
祠於名宦

吳昇

吳昇字亨晦懷寧人宣德間登進士擢工科給事中
昇在科有直節遇事敢言正統庚申廷議郡縣守
令聽大臣舉薦昇以爲可暫而不可常否則受官

公朝拜恩私家矣又議大臣舉御史旣被大臣薦則
大臣有不法御史肯背私恩而抗公言哉咸奏止之
其他封駁糾正尤多有聲於時正統癸亥閩浙間礦
徒爲盜勢甚熾殺叅議竺有司莫可誰何陞昇浙江
右叅議督兵往輯至則捕其酋而斬之撲其黨廉其

失機都指揮以下數人 奏寘之于法衆乃股栗不
二載賊屏息政績著聞後致仕歸

韓 隆

韓隆桐城人永樂中以太學生任永安令時邑方初
建當百務草昧之時隆至築城隍建學宮創公署新
祀典朞年之內煥然有章造浮梁以通津渡邑有巨
寇設計擒獲殆盡邑先有虎患至是木板道通生民
樂業虎北渡河而去民甚德之借留歷十二年卒於
官相與立祠以祀

謝 祐

謝祐字廷佐桐城人天姿雋爽幼有巨志父早卒家貧母躬紡織以拊之嘗牧牛田野間每讀書於牛背上人咸異之甫成童縣尹欲舉民秀增廣學校生員祐願往母惜之爲泣下祐慰母曰兒得爲秀才不愈於牧牛乎遂補庠生勤于課業矢志諸書無不博覽工詩賦及駢儷之文正統丙辰登進士第觀政刑部邑自國朝開科以來無登進士者登進士自祐始丁巳授本部陝西司主事讞獄公恕已未秋以疾辭歸辛酉疾愈赴京壬戌春調戶部四川司主事蒞政有能聲命解官銀萬鎰赴遼東糴糧以實邊庾陞署本

部廣西司員外郎己巳秋北虜入寇改監察御史出
鎮大名練兵保境以爲京師聲援至則修城垣造器
械拊流移訓士卒號令嚴明百度振舉民皆帖然安
業事定還朝陞署本司郎中復奉勅往督山西邊儲
接濟大同宣府事還與實授未幾陞廣東右叅政天
順改元陞河南左叅政戊寅陞山西右布政使蒞官
慎勤存心仁厚凡所設施務使民沾實惠前後志操
始終一致成化丙戌年方五十六苦風疾具疏懇乞
致仕歸家杜門養和不干世務奉觴壽母樂其天倫
爲人器宇軒豁脫略羈馬絕無町畦發言談笑一座

孟頫好評論人物窮其底裏人多服其至當作文雅
淡詩有唐人風致書簡得歐蘇體有宦遊藁藏于家
晚於祖基作室爲佚老所鑿池養魚開圃蒔蔬周垣
植以嘉樹客至則開宴堂中觴詠爲歡或散步園池
以爲適後以壽終

姚旭

姚旭桐城人正統辛未進士選授刑科給事敷奏詳
明直聲動朝宁以見忤權倖謫判鄭州清慎自勵勤
於愛民擢南安知府以寬簡宜民而守嚴一介尤興
文立社孜孜以學校爲先歲水旱遘灾每禱輒應擢

雲南叅政未幾致仕歸

董 寔

董寔字世宏懷寧人國初以武功世襲指揮使寔生而駢脅鐵面膂力絕人性沉毅寡言笑識者以爲不凡稍長從師涉經史誦金版六弢善騎射繼襲父職敷政訓戎吏士咸服每境內有劇盜輒控弦從以數騎手殪之而返正統己巳虜入寇以薦召赴京師廷議大發兵襲虜寔力言國兵新衄賊勢方張不若自守以固邦本賊內不得戰外無所掠必將自遁少保于公亟納其言時舊降虜安置畿內者並起爲盜于

公請授寬署僉都指揮事將一軍自京師抵河間徇
捕之且督操河間瀋陽大同三衛兵盜聞解去尋被
勅鎮河間弛張軍務深協時宜而尤以端嚴自持親
族無敢撓法者河間地瀕水經營繕葺增重門及樓
櫓皆輦壯殊舊居人賴之景泰癸丑召還督操神機
營中軍乙亥從南和伯征湖廣苗賊銅鼓五開賊尤
熾分兵擊之經四十餘戰皆捷進至擡羅擡網二寨
山益險惡衆驚顧莫敢前奮勇先登不終日克之以
奇功獲重賞授都指揮僉事班師復官天順改元
陟

陟

五軍都督府事嘗被命與諸公侯較射矢發

皆中屢蒙賞勞異日 上指公謂諸將曰此黑面都
督最善射特賜楮幣二千辛巳逆賊曹欽夜犯闕聞
變急率麾下士邀賊于西長安門外以神礮攻其家
遂破擒之實授都督僉事尋被勅總督楊州諸路備
倭官軍開府于吳厲將士嚴斥堠簡修戰船戎器威
令赫然震海表暇輒延儒禮士凡武生與鄉選者厚
贐之肄社學者亦蠲其徭役賢聲用彰尋復賜勅兼
督常州及蘇州通泰諸路時鹽賊錢厚糾衆僭號江
海寔畫圖刻期分道進兵策賊敗必走江北嘹角嘴
檄巡鹽御史伏兵數百爲援且曰如約則當捕賊無

餘不然且逸其半已而失約獨以所部兵進獲厚及其黨數十人餘奔嘹角嘴其明于料敵若此癸巳以疾得請還居京師閱十有一年而卒享年七十 上聞訃悼惜諭祭且給麻布齋糧營冢墓臨葬復諭祭焉

柳溥

柳溥字廣達懷寧人父升以千戶從 太宗靖難歷陞都督僉事永樂五年俘獲交趾賊黎季犛父子封安遠伯已進封安遠侯宣德初戰沒于交趾贈融國公謚襄敏七年溥襲侯爵正統三年秋掛征蠻將軍

印克總兵官帥湖廣等都司官軍守廣西是冬征大
藤峽殺賊楊容拾等五月討柳州等處六年復入大
藤峽破石門等寨十年征思恩賊獲常萬王等斬之
寇遂平十四年還進太子太師總神機營兼掌右軍
都督府事復命守廣西天順改元召進太傅仍掌營
府事冬十二月虜寇涼州掛平虜將軍印率兵進討
俘獲人馬無算虜遁邊境以寧二年師還以疾解機
務養於家四年疾稍愈詔起總神機軍務至春疾復
作上命醫調治弗起中外聞之無貴無賤咸咨嗟
悼惜

葉華

葉華懷寧人天順丁丑進士知沂州時州有逋賊潛出爲害民不勝騷繹華多方跡捕盡掩獲之民居乃寧又疲于轉輸曲爲調停區畫咸當至今民猶賴之未幾卒于官巷哭市號如喪厥考立祠祀之

方佑

方佑字廷輔桐城人天順間登進士第拜監察御史佑風裁凝峻孤厲而貞於時咸呼爲鐵面御史旣按畿內捕盜錦衣官校素怙寵爲姦莫敢禁者聞佑風惴惴斂衽繼按陝西刷卷佑穉姦剔穢貪污吏一無

所容咸望風解印綬去繼又按蘇浙巡鹽一洗風弊
鹽利盡歸于公府於是恃勢漁獵者盡啗佑矣繼按
廣西苗窺桂林城守告急佑悉居民尾軍士後令披
甲執器出南門入東門旋轉者數週苗錯愕走佑因
陳弭盜數事謫都憲一人藩臬長以下罰有差繼同
中貴人視刑邊地佑廉得其寃因與中貴人異同以
聞會啗者柄用乘間爲請遂出知攸縣佑至攸求民
利害廢置所宜令出而民稱便四年陞桂林舊按地
銜者陰置之也在桂林八閱月以病歸結屋萬松間
足不及城市超然自得優游以終

程亭

程亭懷寧人天順間以太學生擢監察御史出按江西湖廣驄行豸觸弊絕風清雖奸內之奸必窮其根穴雖貴官大吏不少屈抑能聲甚著而負怨亦多轉江西按察僉事收捕南贛巨盜尋督學政士子咸服其公明以致仕歸

江弘濟

江弘濟字本深桐城人成化間登進士授直隸清豐知縣弘濟於清豐以公廉明恕得民心治行卓異拜監察御史弘濟持重有操守不凌不矜常云御史綱

紀所繫糾察在當人心論諫在識大體識者建其言而重其爲人旣以視鹽法按長蘆風裁凜然人莫敢犯繼以清戎按雲南凡所設施皆有法不爲權勢齟齬成化庚子以疾卒于行臺卒之日總鎮藩臬諸公往斂之見其行李中雖敝衣亦止數襲衆爲流涕有哭失聲者諸總鎮爲綜理歸送其喪復疏其清苦于朝乞賜表勵弘濟外若和易而內實剛正與人交務盡誠敬見人之善若已出之有不善則掩之平生寸不釋卷讀書數行並下爲詩文必根於理不逐時好爲進士時居近長安門每起必四鼓久而不替其蒞

官行已爲時推重云

方向

方向字與義桐城人成化間登進士授南京戶科給事中南京權貴怙寵向特持風裁王端毅公嘗曰方給事真男子弘治己丑以天變連䟽劾守備太監及府部大臣陳祖生等十數人敬皇帝爲黜三人餘勅責之祖生等乃銜向遂緣盧主事事逮向下獄事既直祖生等益恨向己酉御史復劾祖生等祖生等因抵向前獄失出命內外大臣鞠之鞠時獄具烜赫同事者或股栗向不少挫勘者知其寃然不敢直

後竟貶向雲南多羅驛丞廷臣交章爭之皆不報由是向聲聞動天下多羅在西南萬里外向卽日就道旣抵任署縣掌學咸有惠教熨人翕然就治以母憂歸乃築室山中遂欲終焉乙卯以薦陞四川資陽縣知縣資陽久弊向至一洗而新之有坐殺人十年不能決者向廉得其誣辨之聞者歎服復以父憂歸後陞湖廣安陸知州安陸素頑獷梗化向先聲所至亡不懾服一日剖決訟獄數十豪橫斂衽 潘府嘗謂其下曰慎勿干方給事彼不爾貸也癸丑特註廣東瓊州知府瓊在南海中政尚羈縻向至諭以 朝廷

威德大賚而遣之乃後嚴恕並行海嶠馴擾丁卯入
覲卒于京向勁節直氣不可屈撓故每爲權貴所抑
未能究其大用焉

王瑞

王瑞字良璧望江人成化間登進士授吏科給事中
瑞正色立朝多所建白歲壬辰於文華殿抗言內
寵滋甚詞氣鯁直上震怒同列戰慄瑞無懼色辛
丑進都給事中京市亾賴競以奇貨靡費瑞劾其蠱
利罔上乃咸寘干法是時謀倖進者多以左道淫巧
資緣得美官有至太常卿者爵賞之濫極矣上詔

吏部降四人黜六人下九人于獄時久旱厥明乃雨雪學士楊公守陳以詩紀之有 聖主無私從直諫
皇天有感兆時豐之句傳聞 禁內甲辰京師地震
乃上疏論斥權貴或勸其少沮瑞曰苟有利于國家
禍患非所恤也

余順

余順安慶衛人成化間進士知安吉州創學建倉鋤
強恤貧政有便于民者攘臂爲之竟以剛直忤當道
落職歸杜門掃跡不入公府雖宴會亦不赴

李璉

李璡懷寧人成化間進士蘭谿知縣惠法兼濟治行著聞被召入京民有來何暮去何速之謠拜太僕寺丞擢贛州知府時大水且疫璡百方拯救多所全活愛民禮士政化大行閩廣盜入境我師失利勢甚猖獗璡築屬邑城凡五督師深入備嘗劬勩二年擒滅論覈功罪反被讒構謫判大同未幾卒

錢如京

錢如京字公溥桐城人弘治間登進士初授浙江青田令有異政調定海選監察御史清戎江西巡按畿內所至有真御史名清河蓮花池鹵地數千頃爲貴

戚所據歲徵一萬七千餘兩民不堪命京以奏下悉
請歸諸民民德之立祠貌像祀焉陞副使兵備天津
時 武廟南巡經費不擾時論建之嘉靖初改江西
陞浙江按察使有嫉之者左遷貴州公論不平賢聲
益起擢湖廣右布政山西左布政南京太僕寺卿遷
都察院右副都御史巡撫保定等府畿內大饑悉心
賑濟請發內帑數萬緡給之民賴有生轉工部右侍
郎奉 勅提督修葺歷代帝王廟宇以省節完美稱
上意加從二品俸改兵部左侍郎 聖駕幸太學侍
坐賜茶大同兵變京協贊籌畫有功兼左副都御史

提督兩廣軍務所轄多苗獍未馴田州土官仇殺獄
未決當事者利用兵以希功賞京謂夷性不常驅我
民民置之鋒鏑可乎疏請褫職立功自贖兵不血刃
而地方以寧識者稱爲得體陞南京戶部尚書三載
考績命改刑部懇乞致仕上曰卿老成廉靜方
膺簡任不允所辭九廟災軍士入運瓦礫得金珠煨
燼中爲緝獲下獄司官恐上怒以盜祭器論罪京
曰金非器器非珠也始得末減五年審錄上命中
官蒞之法司具在秉筆可否惟京是視上嘉其明
允勞以羊酒六上章乞致仕乃得俞旨家居足跡

不及公門惟山水觴咏自娛者五六年卒于正寢卒
之夕有大星墜于城中事聞上悼惜加太子少保
諭祭者二遣中書治葬如制京端嚴寬厚平居恂恂
不見喜愠色臨大事決大疑徐出片言動中道理夙
性孝友雖位至六卿接親友宗族樂易款容如未貴
時故鄉評以德量享榮祿而不涉驕侈者惟京莫及
焉別號桐溪先生

李淳

李淳字元朴太湖人登進士弘治間仕爲行人司行
人擢刑科給事中抗志敢言多所裨益以忤逆瑾轉

浙江按察司僉事適浙東盜起督兵勦捕之會有星
變出揚州分淳曰杭必有災於是令民間儲米以備
之已而杭城中果火人竒之以與時不合復調廣西
按察司值撫江土猺爲患淳平之及蠻酋讎殺衆推
淳督征應機決策而懾服之臺臣薦于上命未下而
淳卒矣淳純厚無僞望之若無能人及其臨政則又
敏而不滯博學多藝能凡天文陰陽醫卜兵數咸能
究其奧云

余珊

余珊字德輝桐城人登正德戊辰進士授行人選監

察御史遇事敢言不避權倖 乾清宮災疏陳弊政
內直指假子西僧聞者悚然尋以鹽法忤中貴下獄
杖幾斃謫判安陸州復補開州擢知澧州澧地聯夷
峒難治珊首捕桀猾武職毒民疏去之境賴以安嘉
靖改元 詔起言事落職者擢江西僉事平梅花洞
大盜尋擢四川威戎兵備副使威惠並行番夷讐服
上十漸疏剴切餘萬言俱中時弊朝論翕然稱寔以
外艱歸補湖廣副使撫治荆岳適歲饑多方賑濟全
活甚衆陞四川按察使抵任閱月而卒珊性專學博
尤邃于曆數禮部主政鄭善夫薦司天文不報居官

餘一十年而清節始終如一歷內外臺多建言載于
皇明疏議輯略者甚備其歿也人咸惜之

方鵬

方鵬字其大安慶人登嘉靖丙戌進士幼爲庠生時
家甚貧繼母馬氏遇之無道百計順承焉有女云嫁
我女必鬻其居及母死不忍食言果鬻居稱貸以爲
粧奩助父槩病篤吐血一升跪接而吞之幾不自保
尋父歿親刻木像飲食必祭曾他出夢父有怒色醒
卽歸視有家僮簪其像號泣治之孝感如此性嚴毅
瞻文學有排難解紛之才千金不移之節適歲饑家

無宿儲有司知其賢卽周之穀二十斛隨遇告乏者卽分其半與之及得第痛父母之養不逮祿遂終身自薄其奉始官南京工部都水司主事分理龍江關督造戰艦工役德之爲立去思碑轉北戶部員外郎權稅濟墅自足國儲外毫無取贏有權家挾勢漏徵寘之法不爲少貸且建議塾課生徒于其中後督運與附權者訐奏因謫令永淳有異政士民祠祀之旋陞廣東提舉不數月陞陝西督學僉事未及赴任而終年五十有九別號天池先生

張澤

張澤桐城人大父傑累行善事鄉里德之有鄰叟夢
大石立其庭金標古篆不盡曉惟記澤被萬里四字
明年澤生從夢中語名之曰澤字曰大被冲年穎異
七歲授論語至事父母竭力事君致身喟然嘆曰忠
孝當如是夫人咸訝其識度非常爲郡諸生有文譽
從遊者甚衆澤語之曰二三子欲爲聖賢乎將榮肥
是計乎先正之訓謂何而升斗爲榮實惟六經之辱
踴躍獨立鮮知之者少司徒盛公汝謙獨重之數過
其館劇論移日嘉靖戊戌選貢計偕丁未授沅江令
沅多曠土招民開墾資牛種省阡陌沅江大治故事

長吏不他攝澤以沅江攝武陵時洞寇肆掠率兵禦之佯却縱賊大掠翌日復却賊懈陰使奇兵搗其巢獲渠魁遂平無何以憂去旣闕補巫山值歲飢興發捐俸爲粥飼羸尪存活甚衆俗尚女巫杖之火其神巫風頓息戊午陞衢州別駕通賦者盈囷圖寬爲期而出之咸感泣願輸時督撫胡公宗憲威傾兩浙其前驅求索無厭二千石以下唯唯澤獨杖而縛之白其情願解綬去胡公更延以賓禮戒部下曰而不知此郡有廉吏乎督府新募之兵數百擁主糧者而譟澤馳而諭之曰張公至矣遂凜然散有曠寇擾處州

傷官軍將及于衢衢守議避之澤曰不可單騎諭以
威福給米數十石曰爲爾歸餉毋擾一方寇相戒不
入衢癸亥陞廣安知州一日而決淹獄五十置釜薪
廳前訟者徑入炊廳下須臾決判而去民歌之曰張
不解袋焉知閭閻立二倉罪重者入米輕入穀逾年
得米穀千餘斛爲往來儲糈賑諸生貧者之婚葬銓
曹書其名于壁曰天下廉吏張澤相國徐階聞其名
招之曰同鄉也何難一顧公曰羣吏兢兢聽冢宰之
黜陟某不肖何敢私謁相公及計吏爲天下治行第
一乙丑擢僉憲雲南去家萬里兩僮自隨分巡普安

當道雅重之事輒檄委至署七篆簿書旁午益勵精
不遑食尋改武定時屬夷興亂中丞檄澤率兵討之
分兵爲四哨約並濟自當一哨麾其衆前半渡伏起
截流而鼓後三哨不及援兵潰被執遂遇害三日賊
歸其屍面色如生事聞贈光祿少卿廟額忠節歲時
祭祀廕一子入監

趙 鉞

趙鉞字子舉一字鼎卿別號八柱野人世家桐城鉞
瑰異八歲善屬文邑令蔡公銳見而奇之置膝撫其
額曰驥子神駿當一日千里也甫弱冠游邑庠每試

輒冠諸生嘉靖庚子舉于南畿第一人甲辰第進士授刑部浙江司主事讞獄明允時稱神明改禮科給事中庚戌同考會試是歲母太孺人年八袞以冊封得便道歸上壽還朝轉工科左給事中巡視京營時咸寧侯仇鸞怙權寵占役軍卒鉞抗折不撓勒士歸伍因條款軍政六事奏入下所司議行戎政一飭仇鸞之鉞不爲動會父憂奔歸服闋補吏科都給事中丁巳京寮考察疏言虞廷黜陟能使庶績咸熙三苗向化夫考績非以威遠也然公道明則人心正中國安則四夷服今南倭北虜警蹕未息宜簡嫩慝母爽

國是使賢智奮庸著績安攘甚盛比命下所去留抨彈咸當僉服其公戊午陞南京太僕寺少卿專蒞馬政是時民養種馬而官驗之恒峻其罰錢曰畜馬禁騎坐是贅物也弛令自便民德之立祠祀焉嘗與僚佐游瑯琊山見農人苦旱躬禱於豐山雨隨注滁俗耕者專仰雨澤遇旱潦不飭備乃爲文諭之民用興厲陂塘溝澮以時修浚種蒔被野作亭豐山饒之石以章久遠滁舊有陽明書院歲久漸圯斥羨金新之朔望聚諸儒生闡明良知之學諸儒生習其指者皆興起累遷南京鴻臚寺卿通政司通政太僕寺卿晉

僉都御史巡撫貴州兼理軍務貴處遠徼虞瘴癘有
言者錢曰丈夫不志四方乎驅車行北至貴值土舍
韓甸搜司印逐流官糾黨旅兵三省騷動卽命總兵
官石邦憲率夷帥冢繼武等會勦之繫其渠酋羣黨
悉平餘寨皆刻木誓不異萌貴旣荒遠東北連播州
西南雜土府民獠錯居習亂易動乃圖畫便宜條奏
六事皆議行焉錢處官事如家相度城中荒土引渠
走潦辟水田渚流爲池教民習耕植貴之知水耕自
錢始作鳳嬉愛山諸堂與諸大夫游而樂之曰使吏
於土者釋羈思以安職業匪直事燕游也衆聽其言

無何有冒兵功者當道惑之調錢南京有復倡議裁
革軍餉者貽書大司馬虞坡楊公言不便狀且曰錢
遂臣也猶喋喋不置此棄婦願梁笄耳其忠不忘君
類此錢歸建祠堂五所以奉先世之宜廟食者而蔡
謝二邑侯則列祠于念初堂報知己也歲以冬春二
孟舉祭祭之日合宗人讀律法寓勸誠置義田區收
其租入以供二祭有餘遍施三族周其婚嫁衣食之
不給者暇日與諸昆弟觴酒過從竟白首無間與人
交肝膽洞視倜儻有大度好禮賢士作宜秘洞招延
賓客廩食其來學者晚悅佳山水勝日肩輿往來龍

眠浮渡麒麟諸山灌園桐陂復自稱瓠園丈夫預營
壽藏于石鼓山題曰俟丘取修身以俟之義云爲文
章自出機軸闢方士論講學諸說皆闡明理道出前
人所未發詩律清遠樂府古體興絕不凡所著有古
今原始無聞堂藁鶚林子九夷古事等集行于世隆
慶己巳卒得年五十有八

阮鶚

阮鶚號山峰桐城人嘉靖甲辰進士授南京刑部主
事敬簡明允精于讞比時有殺人而櫃于市者都下
譁然莫知其由邏者偵捕宋監生甥抵之業已誣服

鶚心疑爲寃齋沐禱神竟得真殺人者於是聲名大振三載奏最改監察御史巡按順天時任丘進士王聯豪橫數殺人擬大辟乃撫拾胡公纘宗詩誣奏謗訕上怒逮下詔獄并逮撫按藩臬郡守三十六人鶚曰以言語罪人非盛世事矧誣構乎漸不可長乃極力調護事竟得白尋改畿內督學適虜薄都城適校士涿州涿固都城要地也選率生徒張皇號召士氣倍振虜退條上禦虜十事癸丑擢浙江提學副使浙方歲苦倭寇甲寅尤甚令諸生操弓矢習射作忠義之氣乙卯省城戒嚴撫臣檄諸司畫地防守鶚守

武林門則列營關外令士女分道入遞至遞開視他
守者獨無追迫蹂躪之苦民咸德之陞廣西右叅政
臺省交薦謂有文武材可大用超擢右僉都御史提
督軍務巡撫浙江時總督胡宗憲視師尚書趙文華
主和而鶚獨銳然決戰會言官上疏罪議和者奉詔
勅平鶚乃命奇兵四伏正兵突擊賊敗又奔據沈庄
憑險自固復檄諸道分兵四圍夜渡濠薄賊柵火其
巢自辰至酉俘斬甚衆又謂諸將曰寧波鴈門久爲
賊據而舟山餘黨尚在柰何安枕耶遂夜驅水陸兵
並進大破于蔡奇山大潭山水戰于清港洋丘家洋

直抵舟山賊方除夕酣醉遂擒斬無算而賊烽始熄
已改鎮福建時倭犯福寧犯會城又犯福清羽書狎
至日夜治兵儲餉奮擊賊衆于古源陽崎長樂港閩
安鎮凡十餘戰皆奏捷而言者謂其糜費儲餉交疏
論列被逮至京落職歸里後有論督府宗憲侵浙餉
者復以波及至隆慶丁卯始題覆行兩省巡按覆勘
事得昭雪而卽以是冬卒享年五十有九

彭寶

彭寶字惟善桐城縣諸生少事父母甚恭其父母性
皆卞急每交怒寶踉蹌求解不得則涕泣叩頭必得

解乃起一日天雨雪父醉怒母就臥寶跪限外旦啓
門見之問寶何爲者對曰兒不能和兩親乞賜箠楚
父曰我偶醉詈汝母汝何罪引入就爐寶再拜父母
自是不復相怒矣妻事姑稍不敬欲去之里戚百計
留不聽母曰新婦素事我善今小失豈遂處於不可
自新之地乎寶跪受教退謂妻曰妻者齊也而事親
不我齊乎其妻感泣卒以婦道稱寶於父母所親者
必善遇之弟容病心父欲置之死寶諫曰弟病當救
治柰何罪之友愛益篤數年弟死撫其孤世父濟無
子寶鬻書爲營塚壙從妹李早寡守志以沒寶嘉其

節而傷其無傳哀悼切至祖考妣忌日必齋居素服
致祭家雖貧好施宗族閭里之困者量助焉南北郭
舊有義塚往往露骼沙間時聚而瘞之喜放生童子
取雛鳩與一扇使還巢雛翼成鳴窗前若有德者寶
曰吾所活當再鳴則跳向寶鳴不休省齋何先生倡
聖學師事之毅然有志於道條其規曰正心術堅志
向防嗜慾明世務戒矜伐擇師友務實勝嚴課程毋
苟簡毋掩襲寶曰省此十者而尤以孝爲標作慶五
圖圖列五等一父母二兄弟三夫婦四師友五天王
曰達道始父母終天王天生萬物惟人具之可不自

慶乎因以慶名其軒何先生嘗稱惟善德行子恒文學子恒者趙州守銳也寶嘗夢道傍遺金顧而不攬子恒曰羨心未忘耶不攬則已安用顧爲寶翼然不寧者屢日立稽過錄一行失則書一念妄則書月朔正席自數之曰柰何過而不改乎書古聖賢列上坐衣冠跪拜以爲罰曰柰何不改過而愧聖賢乎常曰昭昭之惡寶不敢有冥冥之過寶不能無自訟切至如此嘗獨坐正襟凝神內會忽自語曰好光景人莫測其衷學博陳儀良師也數月卒弟子爲義喪頃多懈寶獨三月服東向再拜後釋之朱司農墓在縣西

二十里寶曰桐之遺愛也親持酒脯爲文以祭因諭墓旁居民掃祀不怠者十數歲寶學日進然劣於文督學者論文當黜邑諸生乞優容孝德以敦風教太守羅公爲言得不黜仍表之曰彰善後每試更以孝行加賞逾四十待父母益愉悅衣服飲食盥滌必親夜尤拭枕席伺寢取襦袴冠履定之父病躬湯藥虔禱祀不愈丁外艱慟絕復蘇治喪準家禮處外寢苦逾年病以事母屬其子曰居喪死當以衰經斂遂卒知與不知皆爲流涕

夏 恩

夏恩桐城人有至性六歲失母嗚嗚孺子慕持服如老成人里中目攝何物兒乃知禮父龍淳樸忘機爲諸生酷貧博童子修以自餉恩旅館侍寢食未嘗有違色嘉靖甲辰甫九歲父寒病瀕危涕泣徬徨不知所出禱天地假屠兒刀潛於暗室刳左股一臠六寸許躬烹羹以進父食之遂愈翼日創臥父詰何創乃知向所食者子羹也驚而大號奈何生父故死兒乎鄰父老趨視嘆異聞于縣令胡公枋義申府太守胡公麟旣一夕夢王祥來謁禮之詰朝得申孝子文詫曰孺子殆祥後身哉賜名子孝字以志請於督學使

者胡公植植曰孺子能孝性固天授未可以中行樂
責之命籍邑博士諸生月給廩五斗膳百文胡守復
以屬貢士趙簡授之經義及長受經儀部阮公自嵩
臬副戴公完之門已而漢川張公遂署桐諭倡明理
學首表恩館穀之以風多士毅然繫籍理學癸亥冬
父天年終哀慟幾絕明年春正月葬孔城之麥園墩
構茅廬一楹於墓側獨居朝夕奠哀聞於野二月間
鄰魏國者夜出遙見墓所有火炬百人尺許者千良
久滅旦詢之於恩無所見也季冬虎哮桐梓山恩子
棲自如廬墓三年身無完衣口無甘味鬚髮皆焦形

容嫡粹服闋始奉主反室始往子甫歲有半女三月
及及子女能貌人不知其爲父也驚問母曰徑入室
者爲誰旣終喪游四方博訪有道者下秣陵汭荆楚
汎越浙客盱江歷事楚侗耿龍溪王甌山張近溪羅
惺堂史質疑請益得一懿訓不啻拱璧耿公督學陪
京攜之歷廬鳳應天諸郡所至留邸與諸名士俱耿
公欲類奏固辭曰不肖子不忍以亡親賈名耿公曰
成子以辭名經歲不過家郡邑大夫益重之司理郭
公嵩錄其行請于直指劉公移文獎之賜文綺白金
將䟽聞會病卒年五十有六囑其子曰葬我父墓側

人稱瞻雲先生

補遺

徐之鸞

徐之鸞字瑞卿桐城人正德間進士吏科右給事中
以言事忤 旨左遷崇德丞勤政愛民百姓至今稱
之擢知長興終副都御史

金燕

金燕潛山人進士嘉靖三十三年知桐鄉性廉介才
猷過人始蒞任時倭寇圍城盛爲攻具以計禦之孤
城得全生靈安堵召補禮科給事中士民感慕立生

祠

THE UNIVERSITY OF CHICAGO